

Meeqqamik paarisassamik inissiinermi sulinngiffeqartarneq pillugu Namminersorlutik Oqartussat nalunaarutaat

Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaanni nr. 5, 19. november 2020-meersumi § 11, imm. 2 malillugu imatut aalajangersaasoqarpoq:

Meeqqamik paarisassamik inissiinermut atatillugu sulinngiffeqartarneq

§ 1. Kommunalbestyrelsip paarsinissamut akuersissuteqarnerminut atatillugu, piffissami ikaarsaariarfusumi angerlarsimaffimmi meeraq paarineqarnissamik pisariaqartitsisutut nalilerpagu, kommunalbestyrelse angajoqqaarsiaasup aappaata sulinngiffeqarnissaanik akuersissuteqarsinnaavoq.

Imm. 2. Meeqqap tigunnginnerani sulinngiffeqarnissamik kommunalbestyrelsi aamma akuersisinnaavoq meeqqamik tigusinissaq angajoqqaarsiat illoqarfigisaasa avataanniissimappat.

§ 2. Angajoqqaarsiat, marluullutik angerlarsimaffiup avataani suliffeqartut, sorliup sulinngiffeqarnissaa namminneerlutik aalajangissavaat. Aalajangersimasumik suliffeqarneq, ilinniartuuneq assigisaalluunniit angerlarsimaffiup avataani suliffeqarnermut ilaapput.

Sulinngiffeqarnerup sivilissusissaa

§ 3. Meeqqamik ataaseq inorlugu ukiulimmik ilaqtariinnut paarsisartunut inissiinermi meeqqamut iliuusissatut pilersaarut piviusoq tunngavigalugu missiliuinikkut sulinngiffeqarnissaq sivilissusilerneqassaaq, taamaattoq takuuk imm. 2-4.

Imm. 2. Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaanni § 3, imm. 2 aamma § 12, imm. 1 malillugit, meeqqamik ataaseq inorlugu ukiulimmik ilaqtariinnut paarsisartunut inissiisoqartillugu, sulinngiffeqarnermi angajoqqaatullu sulinngiffeqarnermi sapaatit akunnerinik 36-inik akuleriissillugit sivilissuseqartuni, inissiinermi meeqqap angajoqqaavisa sulinngiffeqarfigisimanngisaasa sinneruttut minnerpaamik amerlaqataannik, sulinngiffeqarnissamik akuersissuteqartoqassaaq.

Imm. 3. Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaanni § 3, imm. 3 aamma § 12, imm. 2 malillugit, meeqqamik ataaseq inorlugu ukiulinnik marlunnik amerlanernilluunniit ataatsikkut inunngorsimasunik ilaqtariinnut paarsisartunut inissiisoqartillugu, sulinngiffeqarnermi angajoqqaatullu sulinngiffeqarnermi sapaatit akunnerinik 44-inik akuleriissillugit sivilissuseqartuni, inissiinermi meeqqap angajoqqaavisa sulinngiffeqarfigisimanngisaasa sinneruttut

minnerpaamik amerlaqataannik, sulinngiffeqarnissamik akuersissuteqartoqassaaq.

Imm. 4. Sulinngiffeqarneq, naak meeqqap angajoqqaavisa akuleriissillugit sulinngiffeqarneranni angajoqqaatullu sulinngiffeqarneranni piffissaq sinneruttoq sivikinnerugaluartoq, imm. 2 aamma 3 malillugit meeqqamik 1-mik inissiisoqartillugu sulinngiffeqarnissaq akuersissutigineqarsimasooq minnerpaamik sapaatit akunnerinik 15-inik sivilissuseqassaaq meeqqanillu marlunnik amerlanerusunilluunniit inissiisoqartillugu sapaatit akunnerinik 19-inik sivilissuseqassalluni.

§ 4. Meeqqamik ataatsip pingasullu akornannik ukioqartumik ilaqutariinnut paarsisartunut inissiisoqartillugu, meeqqamut iliuusissatut pilersaarut piviusooq tunngavigalugu, missiliuinikkut sivilissusilikkamik sulinngiffeqarnermik akuersissuteqartoqassaaq.

§ 5. Meeqqamik pingasut aqqaneq-marlullu akornannik ukioqartumik ilaqutariinnut paarsisartunut inissiisoqartillugu, ilaqutariinnilu siornatigut meeqqamik attaveqarsimanngitsumut meeraq inissinneqartillugu, sapaatit akunneri marluk tikillugit sulinngiffeqarnissaq akuersissutigineqassaaq, taamaattoq takuuk imm. 2.

Imm. 2. Meeqqamut iliuusissatut pilersaarummi pissutsinik immikkuullarissaoqarpat aalajangersimasumik missiliuinikkut sulinngiffeqarnissap sapaatit akunnerinit marlunnit sivilissunerunissaa kommunalbestyrelsemit akuersissutigineqarsinnaavoq.

§ 6. §§ 3 aamma 4 malillugit sulinngiffeqarnissap saniatigut meeqqamik tigusinissaq angajoqqaarsiaasut najugaqarfisa avataaniissimappat meeqqap tigunginnerani sapaatit akunneri marluk tikillugit sulinngiffeqarnissaq kommunalbestyrelsemit akuersissutigineqarsinnaavoq.

Sulisitsisumut ilisimatitsineq

§ 7. § 1 malillugu sulinermik inuussutissarsiortut sulinngiffeqartut, sulinngiffeqarnissaq kingusinnerpaamik sapaatit akunnerinik arfineq-pingasunik sioqqullugu, meeqqamik piffissaq tigusiffissartik sulinngiffeqarnerullu sivilissusissaa pillugit sulisitsisuminnut ilisimatitsissapput. Pinasuartumik pisoqartillugu sulinngiffeqarnerup aallartinngitsiarnerani ilisimatitsisoqarsinnaavoq.

Atuutilerfissaa

§ 8. Nalunaarut manna ulloq 1. februar 2021 atuutilissaaq.

Namminersorlutik Oqartussat, ulloq 29. januar 2021

Martha Abelsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut